



U' SCIALLI

Commedia tragicomica in due atti di Mauro Italia
Musiche originali di Antonio Zappalà (Zeta) e Mauro Italia

Liberamente ispirata a “U sapiti Com’è” di Francesca Sàbato Agnetta

PERSONAGGI

Cola
Zà Gati
Gaetano
Mara (moglie Gaetano)
Vennira
Zà Pidda
Zà Nina
Sisidda
Garzone
Ragazzo

Copyright © 2018

Mauro Italia • Augusta Sr • Via L.Pirandello, 68

Cell. 330/832156 • E-mail:mauroitalia@loudness.it

Posizione SIAE 148977

TEATRO STABILE DI AUGUSTA
Il PiCCOLO del Teatro Stabile di Augusta

Stasira vaiu a curriri cò ventu, a grapiri li porti di stà storia, di Cola e di so mamma cà lu fici, cù cori e cù la vampa di l'amuri. E' poviru ma di cori è riccu assai, e a mamma so nunnu voli lassari mai, ci dicuno che è tardu e un pocu lu è... lu chiamanu tutti "u sapiti com'è". Ma iddu resta attentu e scurre a vita, e curri, curri sempri cù lu ventu in cerca di la paci di un mumentu. Voli spaccari lu cielu ppi fari chioviri amuri. Rapi li pugna e cunta li ita, restu ccù sugnu Cola Culicchiu e scurru la vita.

ATTO PRIMO

*All'apertura del sipario zà Gati e seduta in scena, una casetta rustica con al centro una cappella con un'immagine sacra, è paralitica, tiene uno **scialle** scuro sulle gambe e recita il Santo Rosario.*

- Gati Ave Maria piena di grazie..... (*ripetutamente*)
- Cola (*entra ansante, trafelato, pallido. Butta in un'angolo un cesto con biancheria raccolta male. Malvestito, si asciuga il sudore con il dorso della manica, parla con voce strozzata.*) Si venunu finu a ccà, a pitrati i pigghiu (*esce dalla tasca dei sassi*) Figghi i buttana...
- Gati Cola! ma chi paroli su chisti?... Maronna Santa ! Ma chi ti ficiru figghiu ! Veni ccà... diccillu a matruzza tua... avanti parra.
- Cola (*con voce lamentosa, e sempre pronto a lanciare i sassi*) M'hannu buffuonato a mamà...m'hannu fattu disfizziari... m'hannu tiratu i petri... ma si turnunu, ci spaccu a testa ccù nà pitrata... Figghi i b.....
- Gati Attonna... ti voi calmari uora... e cunta chi ti successi ? Parra ccà to matruzza!
- Cola Lavai li robbi... poi li stinnia a lu suli... Vossia avia dittu " nun lassari li robbi vagnati ccà poi fetunu... torna ccù la truscia asciutta"... E' veru?
- Gati Certu cà è veru...e poi?
- Cola Matruzza lu ventu... i robbi asciutti si li purtava u ventu... e iu comu ci ieva appressu a chiddi asciutti senza fari abbulari li robbi vagnati ?
- Gati Cà ci mittevutu li petri di supra e li firmavi.

Cola Li petri sunu nò ciumi... comu ci puteva iri iù... i picciotti dicevunu – Curri Cola nun viri cà lu ventu si porta li robbi? – Chi siti babbi ci diceva iu – U ventu chi è latru? U ventu si porta i robbi sciuscianduci di cca, e poi mi li riporta susscianduci di ddà... lu nun mi pozzu moviri... la mamma nun voli...-

Gati Ma figgi miu iu t'hava dittu...

Cola U sacciu chi m'avia dittu vossia! Ora cchi fa... ci duna ragiuni a iddi?

Gati No...no... Ma...

Cola U sapi... ù sapi chi dissì la zà Nzula passannu? Dissi: - Ccà lassatulu stari... 'U sapiti com'è...- Picchi comu sugnu mamà? Picchi mi dicunu tutti di sta manera? Picchi mi fici accussi vossia?

Gati Si... comu ti fici Diu !

Cola Diu? Picchi iddu po' fari figghi! Diu è masculu. Vossia macari mi fa ridiri... La zà Nzula dissì macari: - povira Donna Gati... c'ava accummattiri ccù figghiu comu a chistu – Nun sugnu nu bonu figghiu! Nun fazzu tuttu chiddu ccà mi dici?... Mi dici: - scupa Cola... - e iu scupu...Mi dici: - ammogghia lu cuttuni Cola – e iu l'ammogghiu... si puru vossia si metti contru di mia... Chi haiu a fari iu? Chi haiu a fari.. mamà?

Gati No...no...tu si u figghiareddu dà matrizza tò.

Cola Mamà!

Gati Chi voi?

Cola Nautra cosa mi dissiru...

Gati e tu dimmilla!

Cola Si ti la dicu.... Chianciu... No... oggi no... Picchi oggi haiu già changiutu... vabbè changiu dumani...! Dici...dici... Si la morti avissi l'occhi... si l'avissi purtatu. (*piange*) Eccu ora changiu.

Gati Nun changiri.... Nun changiri figghi. La morti chi è dannu? Quannu a lu Signuruzzu ci fa cori di viriri unu di li so figghi... lu chiama... e lu porta in Paradisu.

Cola Ora a mmia si mi chiama... nun ci dugnu cuntu. Ci dicu: - Diu...haiu a cchi fari – scupu e ci fazzu dari i cianchi.

Gati Avanti ora cuntamu li robbi.

Cola Giusti sunu...ci mancunu sulu chiddi ccà si pertau lu ventu.

Gati Ah...Signuruzzu...nà cruci mi dastuvu...ma pisanti assai.
 Cola Mamà haiu fami
 Gati E lu pani nun tu pertasti?
 Cola Mi lu scurdai nintra la cascìa... mentri lavava mi vinni fami e pinsai... uora ci lu cercu a lu Patri nostru...
 Gati E chi ci trasi?
 Cola Dissi: - Patri nostru ccà si nto celu... datimi oggi lu pani quotidianu ccà Cola su scurdau ntò cantaranu... (*alzando la voce*) Datici lu pani a Cola!....A Cola!
 Gati Ah! Marunnuzza mia!
 Cola Mamà ittava vuci picchi lu Patri nostru stà luntanu e nun mi senti (*gridando*) U pani ccà iaiu fami. Li piccioti si misiru a ridiri... mi dissiru babbu e mi tirarunu li petri... ma qualchi vota... si li capitù... cciu rumpu a testa a pitrati... figghi di buttana.
 Gati Cola uora basta!... Pensa ccà lu Signuri ti viri e ti senti!
 Cola Mi senti? Minchiuni... pi darimu u pani nun sinteva... bellu Signuri!.
 Gati Ah si nun fussi ,nchiuvata nta sta seggia.. non avissi bisognu di tia ppi fari li cosi di sta povira casuzza.

Sisidda e detti – scena seconda

Sisidda (*entra portando anche lei della biancheria e una corona di foglie*) Cola...
 Cola... Vossi binirica zà Gati.
 Gata Santa e bona figghia!
 Sisidda Purtai li robbà chi lassau Cola... e sta curuna
 Cola Iu la fici... e poi li robbi nun mi li scurdai...fu lu ventu ccà....
 Sisidda Lu ventu ? ma allura si babbu veru? (*dolcemente*)
 Cola Avanti Sisidda aiuta a Cola a mettiri a curuna (*prende una sedia, la porta sotto la cappelletta, sale, Sisidda l'aiuta e Cola ride per il solletico*) Ah! Ah!
 Ah! Mi cattigghiu!.
 Sisidda Avaia spicciiti.
 Cola U viri cche bella... (*si avvicina e accarezza in faccia Sisidda*)
 Sisidda Ma chi ti pigghiò?

Cola T'accarizzu! Hai la pelli liscia e frisca... Cola ti voli beni.... Tu mi buffunii...veru? ... e si bedda... Mamà è veru ccà Sisidda è bedda?

Gati Certu figghiu miu...ma non è giusto diricillu!...

Donna Pidda detti poi la zà Nina – Scena Terza

Pidda (*parla con l'esterno*) Un mumentu...un mumentu zà Nina... Nun pricipitamu li cosi.

Cola (*si avventa con le pietre in mano*)

Sisidda Ma allura si Pazzu? C'ìa voi finiri ccu sti petri?

Gati Cola!

Sisidda Vossia sabbenerica zà Gati (*esce...ma Cola la tira*)
Ma picchi mi tiri..unni mi voi purtari?

Cola Ti portu d'abbanna...Cola ti voli beni.

Sisidda Bhi! Patri Figghiu e Spiritu Santu...ma allura si babbu pi daveru (*esce*)

Pidda Donna Gati...Ciaiu a parrari di primura!

Gati Cola pensa a lu cuttuni... Assittativi.

Pidda Nun vegnu ppi mia... mi manna a zà Nina.

Gati E nun puteva venuri idda? Chi è cosa seria?

Pidda Seria?... serissima. Si tratta di vostru figghiu:

Gati Cola?

Cola E sempri a mia?...tutti cosi iu fazzu?

Pidda No...no... di vostru figghiu Gaetanu.

Gati Eccu...Cola guai nichil...Gaetanu u ranni... guai ranni... chi c'è? Chi successi?

Cola (*siede sulla panca assorto*)

Pidda Chi successi? Cà iucannu, iucannu cù Mara... finiu ca si ficiu u ficu... Capistuvu?

Gati Ma chi diciti!...Gaetanu?...

Pidda Gaetanu...Gaetanu.... Si maritau senza sinnucu e senza parrinu.

Gati Gaetanu ? ma iddu voli a Vennira...chidda è viduva... e iu nun vosi... u sapiti...successi l'infernu, ma iddu mi dissì ccà avevunu finitu tutti così... si seppi macari ccà nun era veru... capiti? Chidda e donna cà l'omini l'afferra ccù li manu e ccù l'ugna...uora mi parrati di Mara...nun po' essiri!

Pidda Nun mi cririti...aspittati... Zà Nina vinissi vossa... nun ci criri!

Nina (furente) Donna Gati nn ci criri? Veru è? fussi cosa da nn cririri, Dumannaticillu a vostru figghiu Gaetano... Signuri mio, avia nà niputi cà era un ciuri, crisiuta cu cuttuni e bambaggia, taliannula ccu l'occhi da Maronna... e vostru figghiu... Gaetanu... ha disonurau... ppi quannu è veru Diu ci mangiassi lu cori a muzzucuna...

Gati Ppi carita za Nina... nun faciti accusi... sugnu vecchia e malata! Comu fù cco sapistivu?

Pidda e iu cca ci purtai lu matrimoniu ccu Don Turiddu aballa aballa... nà furtuna

Nina Autru chi furtuna... casa... putia doti e giardinu... beddu sistimatu

Pidda Nenti... nun lu voli.. nui a diri si, idda a diri no... alla fini chiangennu si cunfisso..." Chiddu c'avia... nun l'hai cchiù"

Gati Santa Vergini... Ma comu... Mara ccà nn ci veni... Gaetanu mancu ci passa da vostra casa... nun ci metti peri

Cola I peri nooo... ginocchia, pusi e... però sulu di notti.

Gati I ginocchia?

Pidda Sulu di notti? Ma cchi voi diri?

Nina Muta...muta fallu parrari cca iddu e vucca dà virità.

Gati Nun ci dati cuntu... U sapiti com'è..

Cola U sapiti com'è... U sapiti com'è... comu sugnu mamà? Sugnu comu mi fici vossa. Lu sugnu prufeta.

Nina Certu Cola... si nu beddu figghiu, ma ora parra cchi voi diri?

Cola L'autra notti vitti a Gaetanu... mè fratuzzu... cà acchianava supra la so casa... azziccannu li peri ntè puttusa.

Nina Pi chistu u muru pari na gruviera...puttusa puttusa

Cola Acchianò finu a supra u tettu... ccù li ginocchia... poi mi visti e mi dissì – Mutu e vatinni! Stai aggiustannu u tettu cà è tuttu sfunnatu, e iu ci dissì "i tetti

di notti si consunu...?" e fici finta di iriminni... poi m'ammucciai...e vitti cca
livava i canali... unu a unu...

Nina E menu mali cca m'aggiustò lu tettu.

Pidda Sintistuvu ?

Nina E ancora nun finiu!

Gati Picchi... c'è autru ?

Nina Certu... Gaetanu, dopu tantu amuri, tanti smanii, tanti pazzii... nun si fa viriri
cchiu.

Pidda Accussi dissì Mara

Nina Dici cca avi a parrari ccù vui... Dici...Dici... e nun fa mai nenti! Pi fari u
dannu ha statu bravu... e uora chi ci pari cca si ni nesci accussi ?...
Apprifitta picchi semu fimmini e nun'ha firamu cu nà tumpulata ha ghittallu
nto fumi.

Gati Nun parrati accussi....ppi l'amuri di Diu.

Pidda A Diu lassatulu nta paci. Chisti su così cà sanu abbiassari... sanu a maritar ppi
subbitu.

Gati Nta sta casa ci sunu sulu galantuomini

Nina Sanu a maritari

Gati Vui ccu una manu e iu ccu centu.

Pidda Prima di subitu.

Nina Parramu ccu vostru figghiu?

Pidda Ci parru iu... lassati fari a mmia.

Gati Ci parra ccu ci havi ha parrari. Iu, so matri. Cola o chiama a tò frati.

Cola (mostrando la mano con il cotone raccolto) Nun pozzu.

(entra il garzone)

Garzone Zzà Pidda, a putia è china e vossaia sa spassa ?

Pidda Passa avanti...ca uora vegnu. (garzone via)

Gaetano e detti – Scena Quarta

Gaetano Baciamu li manu... Sabbenerica Mamma.

Nina Quannu mi ni vaiu cca è megghiu!

Pidda Mi ni vaiu macari iu...cca è megghiu... beddu spicchiu di mennula!
Gaetanu Ma chi ci pigghiau... i muzzicaru i lapuna?

Gati Gaetanu... nenti sai?... Dicu a cuscenza pulita l'hai?
Gaetano Nun capisci cchi voli diri vussia ccù sti paroli.
Gati Nun capisci?... nunn'ha capisci a dà povira fimmina?... U sai cà sa crisciutu a so ninputi spaccannusi pusa e schiena supra a pila?... Nun ha capisci veru? U sai cà uora cia tocca maritalla cà vergognia. U sai o no?... picchi tu ora tà mariti veru? Subitu spatti.
Gaetano (arrogante) Certu dumani cà matinata... ma ci pari cca sugnu babbu?... ci pari cà sugnu Cola?
Cola E iu cchi centru uora? Sempri ccu mia sa picchia.
Gaetano Ma chi dici matri?
Gati Dicu chiddu cca diri na matri...
Gaetano Si mi diceva si ppi Vennira... stu dannu nun succireva.
Gati Bedda fimmina è Vennira... na carusa da maritu avia assiri bianca e pulita comu a nivi. Ma uora chisti su tutti discussi pessi. (alza la voce) Ti l'ha maritari...puntu.
Gaetano Nun faciti vuci...cà a genti senti.
Gati Magghiu ccà sentunu...hanu a sapiri ccà na me famigghia cu rumpi paga. Ora o pigghia a Mara e pottimilla ccà.
Gaetano A pigghiari a Mara?... maritati... subitu... a chi era babbu... matri ci haia dittu ccà iu nun sugnu Cola
Cola Attonna parrinu e sciuscia... Gaetanu iu sugnu megghiu di tia...i peri i tegnu nterra e supra li tetti che ginocchia nun ci vaiu...iu nun fazzu chanciri a mamma. E nun sugnu babbu.
Gaetano Ci dicissi a Za Nina cà u tempu ripara.
Gati U tempu ripara?... aspittasti ha fari dannu? No... e uora nun aspetti pi riparari. Puntu.
Gaetano E virgola... Matri iu sugnu nu bravu carusu... ma peri nta faccia nun mi ni fazzu mettiri.
Gati I peri nta faccia ti mittisti sulu...ora ripara e fai u tò duviri... Gaetanu, sugnu vecchia e malata e nun vogghiu chiuriri l'occhi cu rimorsu ca mi mancia a

cuscenza. E se nun ti basta... io to matri t'haia crisiuto... ti fici omu... sula comu n cani... surannu e travagghiannu senza maritu e senza aiutu di nuudo... e vogghiu accussi.

Gaetano Matri li cosi fuzzati nunn'arrinesciunu mai!

Gati Ora o vasa a manu da Za Nina, pigghia a Mara e portala ccà.

Cola prende Gaetano e con forza lo spinge verso l'uscita

Gaetano Babbu nun mi tuccari!

Gati Lassulu stari e vattinni.

Gaetano Cià fazzu pagari chista.

Gati Tu ha pagari no iddu... vattinni.

Gaetano Ma alla fini si unu sbagghia... sbagghia!..chi fici ccù Mara l'ha sfurzai? No!
Chiddu cà fici iu... u fici macari idda...e uora pagu sulu...matri... iu catina o coddu nun ni vogghiu. A Mia ccu mi paga...Iddi?

Gati I tò figghi...quannu u Signuri ti li manna.

Gaetano i mo figghi...? A mia mi stanu trattannu comu un picciriddu.

Gati E Allura? Pi mia si sempri picciriddu... finiscila ora... prima iu era tò patri e ti fici a vuci rossa... Ora sugnu to matri vecchia e malata... i me peri sunu ormai nintra la fossa.

Cola Chi dici mamà... i to peri sunu cca vicinu a seggia.

Gati Gaetanu... nun mi dari colliri! U sai lu me cori è comu nvecchiu orologiu... batti batti e batti...camina camina camina...avi assai cà camina... basta picca e si ferma ppi sempri.

Gaetano (in silenzio e con la testa bassa esce di scena)

Gati e Cola – Scena Quinta

Cola (Cola ha finito di avvolgere la matassa di cotone che si imbriglia sulle sue dita) Mamà... viri che bella...m'abrugghiaiu i irita... chi ffa pozzu moriri?

Gati Ma chi dici...

Cola Mamà... picchi ci dicisti a Gaetanu cà avevi un orologiu nto cuore?

Gati Nenti figghiu beddu...nun su così ppi tia... ti cunfunnunu a testa senza ragiuni.

- Cola Veru è mamma....mi cunfunnu tuttu...sti paroli nintra a me testa furrianu
girunu e mmammaraggiu.... Comu si li susciassi u ventu...fanu ffffff ffffff e
mi scappanu di la vucca comu vonu iddi...no comu vogghiu iu! Picchi mamà?
- Gati Picchi accussi voli Diu
- Cola Mizzica però ...ma quantu cosi voli Diu?
- Gati E quante ancora ni vorra...
- Cola Booooh! E chissacciu ! Ora dicu... comu fa a sapillu vossia cà Diu voli
ancora cosi... nunnu viri mai.
- Gati Senti Cola...to frati Gaetano...ora si marita
- Cola Biii chi bellu...ni mangiamu i dolci... dolci... và chiddi co zucchiru... i cunfetti
chiddi ca mennula... unni su misi mama? Ni vogghiu assaggiari unu.
- Gati E quannu si marita... Mara veni cca a stari cu nuautri... e diventa to suruzza.
- Cola Mara addiventà me soruzza?
- Gati Si figghiu
- Cola Mamma chi veni a diri maritarisi?
- Gati Vuol dire vulirisì beni.
- Cola Allura iu sugnu maritatu cu vossia?
- Gati No iu sugnu to matri.
- Cola Allura ccu Sisidda sugnu maritatu... a vogghiu beni assai... stanotti
mansunnai... fici nsautu ppi pigghialla.. sbattii a testa nto lettù e mi fici nu
ccuccuruni tantu.
- Gati Lassa stari sti cosi cà nun sunu ppi tia... Senti figghiu...iu sugnu vecchia...
- Cola Vossa nunnè vecchia... e sulu... ranni e iu a vogghiu beni assai (*l'abbraccia*)
- Gati Quannu nun ci sarò più...promettimi...
- Cola Nooo! Si vossa si ni va...mi nni vegnu macari iu
- Gati Figghiu ... quannu Diu chiama...
- Cola Voissia nun c'iarrispunni... ci diciti "lu iaiu un figghiu ca... sapi lavari... sapi
scupari... Ma senza di mia nun ci sapi stari...Chiamati ha iddu cà vi scupa u
paradisu..." unfennu no... mi scantu.

Gati Cola...senti a to matruzza... quannu ti dirannu "a to matruzza è in paradisu..."

Cola Mamà...chi fa mori uora?

Gati No...no ca nun moru ora...nun ti scantari, ma si succeri ed è veru cca mi voi beni, tu nun chianciri... a pinsari...a mamma uora è cuntenta...è ccu Diu e mi talia.

Cola E vossia mi talia sempri?

Gati Sempri...e riru ccu l'angili... e tu assiri cuntentu... picchi senti chi ti ducu.... Ppi li vivi si chianci... e ppi li morti si riri... i morti stannu in paci.

Cola Allura si vossia mori... iu riru?

Gati Sicuru

Cola si... iu riru cu la ucca... ma u cori pigghia e chianci sulu.

Gati Allura tu ha fari sempri chiddu ca ti dici to frati e to soru... accussi comu fai ccu mia... mi lu prometti?

Cola Si... ti lu primettu.

Gati E uora ni dicemu lu Santu Rosariu... Ave Maria, china di grazi...

Cola Di Grazi...

entrano Gaetano e Mara (Scena Sesta)

Gaetano Trasi Mara... chi è?... t'affrunti di me Matri? (*la tira verso la madre*)

Gati Figghi mei... viniti... nun si va contru li liggi di Diu... ma siti picciotti e li piccati d'amuri Diu li pirduna...chiddu ca successi... successi... cuminciati tutto d'accapu... vulitivi beni... mittitivi in grazia di Diu...e dati a sta vicchiaredda u piaciri di viririvi filici... Veni figghia...avvicinati...

Mara (*Si avvicina...si inginocchia le bacia le mani e piange*)

Gati Nun chianciri Mara... chistu è ghiornu di cuntintizza.

Cola Mamà... Mara chianci picchi Gaetanu ci rumpiu u tettu.

Gaetano (*Si inginocchia*) Mamà mi pirdunasti?

Gati Si figghi... è Diu ca và perdunatu... itivinni in chiesa

(baciano le mani a Gati ed in silenzio mano nella mano escono)

Gati *(intonata una dolce nenia)*

Canzone: Ninna Nanna (voce: Sabrina Russo)

Fine Primo Atto

“ U Scialli ” di Mauro Italia

ATTO SECONDO

Pidda e Garzone – Scena Prima

- Ragazzo Za Pidda... a brocca è vacanti e a panza macari.
- Pidda Na vita ci voli pazienza... a iatta piscialora a fattu i iattareddi orvi.
- Ragazzo Za Pidda... ma cam'affari a mammà mi dissì c'avemu a mangiari
- Pidda Senti Picciriddu... uora mangia e vivi. Iu aiu a chi ffari... sugnu sula e non c'arrivu a fari tutti cosi.
- Ragazzo E u babbu di Cola chi fini fici? Nun vinni a putia chi fici sa caliau?
- Pidda E lassatulu stari a du poviru figghiu... So matri a Za Gati e malata gravi... stanotti ci fici a nuttata... Gaetanu e fora cò carrettu... e Cola... c'affari Cola, cunfusioni. Ora aspettu Vennira ppi darimi na manu ntà putia.
- Ragazzo E iu ppi manciari chi fazzu aspettu a Vennira? ... Picchi nunnà chiuriti sta putia.
- Garzone (entrando) Salutamu zza Pidda... Mi manna Don Cicciu u'muraturi, voli tri anciovi pigghiati do mezzu da lanna... na vastedda di pani e menzu litru di vinu... Dici si l'anciovi sannu di lignu... nun ci paga.
- Pidda See!!! E chiddi cà sannu di lignu... chi fa mi manciu iu?
- Garzone E chi mi cunta a mia...
- Pidda S'apprufittanu picchi sugnu sula nta putia.
- Garzone E picchi nun si pigghia n'aiutu.
- Pidda Ca quali... nuddu voli travagghiari... venunu tardu e si ni vanu prestu... si ci cercu u pumaroro ppa salsa... m'arrispuannu... e chi sugnu cucineri... ci dicu scupa... e chi sugnu scupaturi... lava i piatti... chi sugnu sguattiru... Sula vogghiu stari... m'ammazzu di travagghi... ma saziu nun ci ni dugnu.
- Garzone Vi mettunu i peri supra a facci picchi siti fimmina sula.
- Pidda Vatinni va... e senza alliccari l'anciovi... ca a don Cicciu ci piaciunu co sali di supra.
- Garzone Za Pidda ma picchi vi chiamanu Strega?

Ragazzo A chimunu strega picchi sapi fari i majarie.
Garzone Ma allura nunn'è strega ie majara... si fussi straga facissi...
Ragazzo Chi facissi?
Garzone I stregherie.
Pidda Ah si fussi strega... ci facissi a qualcunu qualchi majaria... itivinni tutti e ddui.

Cola e detti – Scena Seconda

Cola (entra, tristissimo, confuso, pensieroso) Za Pidda!...za Pidda!
Pidda Cola...menu mali cca vinisti..... comu sta to matri... megghiu? Mettiti
n'mantali e datti versu ca iu nun ma firu cchiu.
Cola No... iu haia turnari nti me matri.
Pidda Si senti mali?
Cola E cchi sacciu iu...macari haia chianciutu...
Pidda Cola tu nunn'ha chianciri cà fai scuraggiari a to matri.
Cola Za Pidda iu...sapiti chi fazzu...m'ammucciu e chianciu.
Pidda E picchi vinisti allura?
Cola Mi manna a zza Nina... voli nà buttigghia di acqua biniditta.
Pidda Ma allura sta peggio?
Cola No... ma matruzza bona sta... havi sulu l'occhi chiusi...e trema tutta... ci
misimu na cuperta finu a testa e trema u stissu. Idda trema e iu chianciu.
Pidda Ma c'affari cu l'acqua biniditta
Cola U miraculu... iu ci dissi a lu Signuruzzu... si faciti stari bona a me matruzza vi
portu un ciru ranni quantu a mia.
Pidda Povira vecchia... chi sa teni a fari lu Signuri
Cola (arrabbiato) Sa teni pi farici a matri a Cola... nun fa nenti si è malata...nun po'
travagghiari...travagghia Cola... e se lu Signuruzzu nun ci fa lu miraculu...
inveci di priarlu... iu ci dicu... ci dicu...u sacciu iu a poi chi ci dicu.
Pidda Mutu Cola! Chi su sti discorsi...u Signuri ti castiga
Cola E chi m'anteressa... (sbatte arrabbiato e scappa)

Pidda e Vennira poi Gaetano – Scena Terza

Pidda (*sistema in giro*)
Vennira (*entrando*) Salutamu zza Pidda.
Pidda Menu mali ccà vinisti... dammi na manu cà sugnu stanca.
Vennira Haiu vistu a Cola ... pareva siddiatu
Pidda Havi so matri ca si senti mali... dici cà trema e iddu chianci
Gaetano (arrabiato entra e guarda Vennira che è di spalle) Vennira!
Vennira E semu chiu assai
Gaetano Chi vinisti a fari cca?...si po' sapiri?
Vennira Vinni a fari chiddu cà mi pari e piaci
Gaetano Vennira...bada a comu parri...
Vennira Parru comu vogghiu.
Gaetano Arricogghiti a casa...
Vennira Arricogghiti tu a casa...e dacci versu a to matri cà è malata
Gaetano Me matri ? chi è malata?
Vennira Fai finta di nun sapiri nenti?
Gaetano Nenti sacciu... sunu du iorna ca sugnu fora casa cò carrettu... du notti senza dormiri p'arrivari chiu prestu... appena arrivatu vinni ni tia...e mi dissiru ca eri cca.
Vennira E si sugnu ccà
Gaetano A casa vattinni moviti.
Vennira Cummanna a to muggieri...
Gaetano Vennira cerca di finilla ...nun mi fari nesciri pazzu.
Vennira Vatinni e nun mi incitari...cercati a to muggieri.
Gaetano Stai attenta Vennira... viri cà nunn'arrispuu di mia
Vennira fai chiddu cà voi... a mia numm'anteressa... Chiuttostu vatinni ni to matri... pi fozza ma fari parrari?...vatinni ti dissi.
Gaetano Iu di cca nun mi movu!
Vennira Iaiu a ch'iffari ca za Pidda.
Gaetano Nun mi movu... nun ti lassu cca a fari a civetta cu libertà. M'avvilinu lu sangu chiassai di quantu l'haiu avvilinatu.
Vennira To matri sta murennu...vattinni
Gaetano Cca mi staiu.

Vennira Ma alla fini si po' sapiri chi voi di mia?... Ma cu quali dirittu parri... Cu si? Me frati...me patri... me maritu...si po sapiri ccù schifiu si?... e finiscila ca mi urtasti... fatti l'affari dà casa to... pensa a to matri cà è malata assai... Poi c'è to mugghieri... ti la pigghiasti cu tanta amuri cà mancu aspittasti lu jornu do matrimoniu.

Gaetano (*l'afferra violentemente*) Muta tà stari e veni o ti trascinu finu a casa.

Vennira Pi l'amuri di Diu ..Lassami!

Canzone: Ma chi voi tu di Mia (cantano: Vennira e Gaetano)

(Nel intermezzo musicale Gaetano e Vennira Ballano appassionatamente)

Mara e detti – Scena Quarta

Mara (*Entra, vede Vennira e la collera l'accieca*) M'ommagginava cà erutu in buona cumpagnia.

Gaetano (*scuotendola*) Chi vinisti a fari ccà...passa pà casa!

Mara Chi bedda facci hai?...spatti m'addumanni... t'avemu aspittato comu u missia...vittimu u carrettu e tu nun spuntavi... ie spuntai iu.

Gaetano Tornatinni a casa...u sai cà nun ti pirmettu!

Mara E tu veni ccù mia.

Gaetano U sacciu iu chiddu c'haia fari... nun mi fazzu cumannari di na fimmina.

Mara Alla fini sugnu tà mugghieri!

Gaetano Tantu megghiu.

Mara Gaetanu ... nun mi fari perdiri a pazienza

Gaetano Taia dittu vatinni a casa.

Mara A casa ci vaiu ccu tua.

Gaetano A casa cci vai sula!

Mara Cu pratica u zoppu all'annu zuppa... ti scurdasti macari a to matri.

Vennira E cu fussi u zoppu?

Mara Haiu dittu zoppu?... vuleva diri zoppa... parru ppi cu sa senti!

Gaetano T'haia dittu vatinni a casa!

Mara (*ironica*) Mi sta facennu scantari tutta...

Gaetano T'haia dittu vatinni!

Mara Mi ni vaiu... vaiu ni to matri..tantu di tia e di sti beddi spicchi cà s'allippanu
ppi farisi taliari... nun m'importa nenti!
Vennira Parri di mia?... iu a Gaetanu nun u vulia tantu cà ti lu lassai!
Mara Fossi ie mugghi cà mi nnni vaiu ! (esce)

Scena Quinta

Pidda (*entra dalla comune*) Gaetanu...camina va.... vai ni to matri... ppi
scrupulu.... A Matri è Matri... lassa stari... l'amuri va e veni...
Vennira E quannu si nni va, nun torna cchiù.
Gaetano (*la guarda male*)
Pidda Dai Gaetanu....cu na vasatedda Mara si scorda tutti cosi....vai ni to matri.
Gaetano A salutu zza Pidda (esce)
Pidda (dopo una lunga pausa) Haiu sintutu tutti cosi... Vennira e mo
tempi...quannu si vuleva beni un uomo... sti caprizzi nun ni facevumu.
Vennira Quannu si vuleva beni...
Pidda Picchi...tu a Gaetanu ?
Vennira Chiu assai da me vita zza Pidda... quannu mi iettai nta li so vrazza
cirennumi so mugghieri davanti a Diu.
Pidda Cu è cca nun vosi...a zza Gati?
Vennira Quannu li dui si volunu...li tri nun si sciarrianu. A iddu ci hava parsu ca s'avìa
passatu nu capricciu... ci dissì " Mugghieri o nenti ". E ppi darimi nà risposta
ai maritau a Mara.
Pidda Picciotta schetta...chi putevi fari?
Vennira Acettu...l'onori su lu li picciotti schetti l'hannu? I lu era maritta, viduva ppi
giunta... Si capisci... Unu chiu, unu menu... Chi ci fa? ... Ma ora, ora veni u
me mumentu. Ora cà Gaetanu ie incatinatu cù Mara ccà nun voli beni... ci
fazzu viriri iu... Picchi Gaetano voli a mmia... cu mi appi na vota... m'à
desidera sempr !
Pidda Patriarca San Giuseppi...

Cola, Sisidda e detti – Scena Sesta

Sisidda Veni, veni ccà
Pidda Cu è?
Sisidda Iu sugnu, Dice a Za Nina, si lu tinissi ccà a Cola a casa i sta facennu nescirti pazzi.
Pidda Comu sta a Za Gati
Sisidda Cu l'anima appinnuta... (*tirando Cola*) A zza Pidda ti voli...veni ccà... veni ccà.
Cola Iu... iu vulissi stari ccù me matri.
Sisidda ma chi è ... già ti ni vo iri?... Ccu to matri ci stai iu u senti?
Cola A mamà avi l'occhi chiusi... nun parra
Sisidda Dormi... quannu s'arruspigghia... ti chiamu.
Cola Idda sempri a mia chiama... basta ci vaiu.
Sisidda No... tu tà stari ccà, si no a za Pidda nun ti paga. E comu ci l'accatti i medicini a tò matri?
Cola Za Pidda è veru cà nun mi paga?
Pidda No...figghiu, veni ccà Vennira, dammi i fasola cà Cola li pulizia.
Cola Li vogghiu puliziari ni me matri.
Pidda Cola tà dittu di stariti ccà.
Sisidda Cola... nun ti moviri... statti ccà... iu appena tò matri s'arruspigghia ti chiamu... Cola... si ti movi nun ti vogghiu cchiu beni.
Cola No...no... tu sempri mà vuliri beni.
Sissidda Santu Diu... Za Pidda nun lu facissi nesciri.
Cola (*versa i fagioli sul tavolo e comincia a pulire*)
Vennira (*riordina cantando*)
Cola Vennira... Vennira
Vennira (*non gli dà retta*)
Cola (*gridando*) Vennira... Auh!
Vennira Ma cchi voi figghiu do Signuri...
Cola Nun vogghiu cà canti.
Vennira Picchi ?
Cola Nunnu sacciu picchi...ma nun vogghiu cà canti.
Vennira Va beni va... vaiu a sbarazzari

Cola (sì precipita verso Vennira... a Za Pidda lo blocca)
 Pidda Ma lu sai cà si troppu furiusu?
 Cola Nunn ha vogghiu beni iu a Vennira.
 Pidda E si pò sapiri picchi?
 Cola A mamà mi dissì cà è tinta e Gaetanu è incatinatu.
 Pidda E tu nn ci cririri.
 Cola A Mamà mo dissì e iu ci criru e basta.

Scena Settima

Pidda Cola, veni ccà assettiti ie munna sta fasola.

(Cola si siede in un angolo e comincia a lavorare)

Vennira (entra agitatissima) Za Pidda!!!... Za Pidda!!!
 Pidda Chi successi ?
 Cola (pulisce i fagioli).
 Pidda Chista iè la strada c'amaffari tutti.

Venira prende posizione in una parte del palco, al centro Pidda, entra Sisidda, le tre donne prendono posizione, come statue inespressive fanno il segno della croce e si alzano la veletta decretando la morte da Za Gati.

Sisidda e detti – Scena Ottava

Sisidda (dopo la scena senza ricomporsi s'avvicina a Cola e dolcemente sussurra)
 Cola!
 Cola A mamma s'arruspigghiau?
 Sisidda No... no... Cola... assettiti... Senti... a mamma nun suffri cchiui!
 Cola A mamma sta bona? Grazie...u Signuruzzu m'ascutau... Miraculu... miraculu
 Sisidda No... No... Cola a mammuzza tò è in paradisu...uora è cu lu Signuruzzu.
 Cola Mamà...a mamà si ni iu... accussi malata?
 Sisidda Nun soffri cchiui... a mamà è cuntenta... riri cu l'Angili e macari tu a ririri...a
 ghiessiri cuntenta.
 Cola (è starziato dal pianto...si frena e con sforzo inaudito tenta di mutare la
 contra del pianto in risata) Chi fa ora... haiu a ririri?.... Ah!...Ah!... A mia nun

mi veni di ririri... a mia mi veni di chianciri... (**battito di cuore**) (con voce strazzata grida) Mamà... Mama... A Mamma a mamma voghiu. (**Il battito di cuore aumenta il volume**)

Pidda

Sisidda Cola Vennira

BUIO IN SCENA

RITORNA LA LUCE IN SCENA MARA E COLA

Scena Nona

- Mara (*dalla comune guarda fuori, facendosi ombra agli occhi con la mano destra, trema di rabbia*) Nun veni, nun veni... M'abbrucionu l'occhi a furia di taliari stra strada ianca e china di suli!
- Cola Havia a veniri,! Nun'è chista la so casa? Nun si tu sa muggieri? Nun sugnu iu so frati? Nunn'è ccà u so lettù? Hava a veniri ppi fozza.
- Mara E quanno veni... stanotti, dumani?
- Cola Veni a diri ccà nun po' veniri prima...
- Mara Ma lu carrettu era ntà la strada... u viristi bonu?
- Cola Ntà la strada era u carrettu.
- Mara Davanti a casa di Vennira ci passasti?
- Cola Ci passai!
- Mara E Vennira nintra era?
- Cola No!
- Mara Era nà Zà Pidda?
- Cola Gaetano nun voli ca Vennira sta nta putia.
- Mara Nun voli?... si scanta cà sa robbunu...? E' inutili! Ccù la pazienza e li boni maneri nun s'arriva a nenti... Si nun la rumpu, nun pozzu aviri paci... No!
- Cola (*pausa*) lu sacciu nà cosa, ma nun pozzu parrari... Picchi Gaetanu m'a dittu "Cola rispunni a chiddu cà ti dumannunu e parra picca" Tu nun maddumanni e iu nun parru!
- Mara Ma comu t'addumannu si nun sacciu chi t'addumannari.

Cola E iu... pipa.
Mara E' cosa di Gaetanu?
Cola Si!
Mara (ansiosa) Moviti parra...
Cola E tu addumanna... addumanna!
Mara Ci mancava sulu stu babbu.
Cola Iu nun sugnu babbu!... sugnu profeta.

Mara Va beni... sii profeta, ma uora parra!
Cola Nun pozzu!
Mara Cola viri ccà ti lio sonu!
Cola Sonammilli... ma viri cà a mamma ti viri!
Mara Cola parra... viristi a Vennira?
Cola No!
Mara Viristi a Gaetano?
Cola No!... tu addumanna e iu arrispunnu...
Mara Ti rissiru qualchi cosa di iddi?
Cola Si, mi lu dissiru.
Mara Cu ti lu rissi?
Cola A zzà Tinicchia!
Mara Li visti?
Cola Si!
Mara E unni?
Cola Insemula.
Mara Unni?
Cola A la casuzza sdirrubbata!
Mara Suli?
Cola Nun lu sacciu!
Mara E mi lu dici ora... dopu un'ura ca mi camuliu?
Cola E tu picchi... nun m'addumannasti prima?
Mara (arrabbiata) Ah! Si ni vanu 'nsemula a casuzza sdirrubbata, mentri iu. scimunita restu nintra? E spatti gaetanu mi proibisci di nesciri! Si capisci 'A fimmina dintra e l'omu a divittiris! La fimmina chianci... e l'omu riri!
Cola Gaetanu mai arri.

Mara E pò ririri mai to frati? Havi lu pinseri nti n'autra!... Nunni pozzu cchiù! Alla fine... ddu manu avi idda e ddu manu iaiu iu... si ni eru alla casuzza sdirrubbata alla facci mia? Ora ci vaiu! Alla faccia d'iddi! (*prende lo scialle*).
 Cola Nun nescri... nun nesciri... ca Gaetanu nun voli!
 Mara Si iddu nun voli... vogghiu iu!
 Cola Viri cà ti li sona!
 Mara No, no ni li spattemu!

Cola Mara... Mara!
 Mara Chi è ccà voi?
 Cola C'haia fari iu ccà nintra?
 Mara Ccà fari? Ietta tutti cosi nta l'aria! A mia nun mi importa cchiui di nenti! (*via*)

Scena – decima Cola poi Sisidda

Cola (*rimasto solo si guarda intorno con aria imbarazzata, quindi prende la scopa butta a terra il servizio da caffè. Lo stesso fa con gli oggetti sopra il tavolo, spazza tutto in un angolo, sospira di soddisfazione. Si siede, prende il rosario dalla sedia della madre lo bacia e comincia a pregare*) Chistu si lu scurdo la me matruzza... Salvi o Regina... matri... Regina signora Regina... Nenti chista nun la sacciu! Canciamu preghiera... Dio salvi Regina... bih! Sempri a stissa dicu... avi Maria avi di grazia... il Signore è ccù tia... si ccù tia picchi ccù Cola nuddu c'è!

Sisidda E' permesso?
 Cola Trasi Sisidda!
 Sisidda Nun c'è tà cugnata?
 Cola Uora si nni iu!
 Sisidda Assai ci sta a turnari?
 Cola Nunnu sacciu!... Chi voi tu?
 Sisidda Cci vuleva addumnannari si mi pristava i tazzi e i cucchiarini do serviziu bonu... mi servunu dumani sira.
 Cola Mmmmm! Nun ti li po' pristari...
 Sisidda Picchi?
 Cola (*acennando al mucchio di roba per terra*) Li scupai uora uora!

Sisidda Bihh!! Piccatu! Lu bellu serviziù novu.. ma allura ppi daverui babbu si?
 Cola Nooo! Iu nun sugnu babbu... sugnu prufeta.
 Sisidda Siii... bellu prufeta si!
 Cola Ma c'affari dumani?
 Sisidda M'appuntu lu matrimoniu ccù Liddu.
 Cola Ti mariti? E a mia mi lassi?... ma nun erutu maritata ccù mia?
 Sisidda Ccù tia pi schizzari... ccù Liddu ppi daveru!
 Cola E com'è ppi daveru?
 Sisidda Mi porta in Chiesa... Mi mette lu velu...
 Cola Picchi cchi ci su i muschi?
 Sisidda Poi mi nni vaiu a stari a casa cu iddu!
 Cola E ti cucchi ccù iddu?
 Sisidda Ma cchi dumanni fai Cola?
 Cola Vergogna... nun t'affrunti? Iu m'affruntassi... poi ti viri spugghiata e ti dici
 "Scustumata" e ti li sona... e ti fa l'occhiu niuru comu n'à milinciana.
 Sisidda Lu scustumatu si tu!
 Cola Lu sai chi veni a diri maritarisi?
 Sisidda Vulirisì beni.
 Cola No...no...no macari iu pinsava accussi... poi visti Gaetanu e Mara
 e...Maritarisi veni a diri... sciarriarisi tutti i iorna... sempri... sempri... s'ù
 maritu voli nesciri... la mughieri si siddia...si la mughieri voli nesciri e lu
 maritui nun voli... Poi si ni va e idda chianci... Iddu nesci e si nni va alla
 casuzza sdirrubbata ccù nautra firmina... torna e si sciarriunu attonna... E a
 ura di mangiare , nun mangianu... ne iddi e ne Cola... Iddu dici ca va a
 travagghiari e poi si nni va nti Vennira... poi torna e si sciarrianu cchù forti...
 Si dicunu tanti paroli lari... Dà firmina cci curpa...
 Sisidda Vabbe Cola... tornu quannu c'è tò cugnata.

Scena undicesima

*(entrano due donne misteriosamente avvolte in scialli) portano un pentolone, si guardano
 in giro rassicurandosi che nessuno li veda, posano il pentolone al centro
 della scena.*

Cola (*spaventato si nasconde*)
Pidda Prestu zzà Nina... Pigghiassi chgiddu cà iavi a pigghiari e niscemuninni prestu di stu n'tricu... masinnò a lignati ni finisci.
Nina (a Cola) senti Culicchiu...tu ma fari mplicari... di chiddu cà viri fari... nunn'à diri nenti a nuddu... U senti? Su così ppi lu beni to, di to frati e di Mara, ppi falli turnari nta paci, e tu n'hiutari!
Cola Iu mi scantu...
Nina No... no... rapi i cassetti di lu cantraranu e pigghia un paru di mutanni di Gaetanu... adesso va...moviti.
Cola Iu mi scantu... picchi nun ni pigghia vossia?
Pidda za Nina... nun facemu sbagghi... chiddu cà dicu iu fu liggiuti di me nannu nto libbru dill'arca di Noè... e su paroli signaliati... Si lu tradituri è l'omu... li mutanni l'ha pigghiari nu picciuttedu schettu... Si la traditura è na fimmina, li mutanni l'ha pigghiari nà verginedda. Poi gnutticati, attaccati ccù li stissi lazza, ittatili nintra lu focu vivu... mentri abbruciunu... cusiti e scusiti la trama dill'ingannu. Pistati l'acqua nti lu murtaru, faciti promissioni a li santi...e faciti lo scungiuruppi du voti consicutivi... Ora ca lu sapiti spicciativi.
Nina Spicciiti Cola pigghia chiddu cà ti dissì!
Cola No... no... iu mi scantu.
Nina Moviti babbu,,
Cola Iu nun sugnu babbu... sugnu prufeta.
Nina No, no tu si nu beddu figghiu.. ma nun ti scantari...facemi la fattura a Gaetanu e vennira ppi lassarisi... Capisci?... Accussi torna la paci...e campati cuntenti... Nun ti piaci? Nunn'è pure po' tò beni? Nun ci si macari tu intra stu infernu?...
Cola Picchi nun ci la faciti a Mara e Vennira a fattura? A Gaetanu nun vogghiu.
Nina Cola... tal'è fino a st'ura t'haiu prigatu... ora si nun ti movi... ti dugnu na passata di lignati.... (*fa cenno di prenderlo a schiaffi*).
Cola Vastunati mi duna?
Pidda Spicciiti cà è megghiu ppi tua!
Nina I pigghi boni!
Pidda Si nun li pigghi... Gaetano si ni va ccu Vennira e ti lassa sulu comu n'cani.
Cola (prende le mutande)

Nina Pigghili, l'ammogghi stritti stritti... l'attacchi e quannu ti fazzu signali... li ietti ntra lu focu!

Pidda (a Cola) pigghia lu murtaru mettici l'acqua e porta tutti i cosi ccà

Cola (esegue)

Nina (estraendo dal petto un involucro dove vi sono i capelli) Chisti sunu li capiddi di da svirgugnata ruvina famigghi! Accussi putissi bruciari nintra l'infernu.

Cola (vuole scappare)

Nina/Pidda Nun ti moviri di ccà

Pidda Vossia a la me manca ccù li capiddi nte manu... Cola quannu ti dicu iettilli... tu ietti li mutanni.

Trasi, sputtusa ddu cori ingratu.

E fallu addivintari cori innamuratu.

*E se cori innammuratu nun voli addivintari,
'ntra li magghia di catina facitilu 'ngagghiari*

(a Cola) prestu iettali!!!

Nina Prestu!!! Prestu!!!

Cola (butta le mutande nel fuoco)

Pidda (a Cola) Ripeti cù mia! Vossia pure zzà Nina! (*in coro*)

Trasi, sputtusa ddu cori ingratu.

E fallu addivintari cori innamuratu.

*E se cori innammuratu nun voli addivintari,
'ntra li magghia di catina facitilu 'ngagghiari (due volte)*

(a Nina) Li capiddi!!! Li capiddi!!!

Nina (butta i capelli nel fuoco) Brucianu li pinsirazzi tinti!

Pidda Pista... pista Cola e dici accussi: Ti pistu la facci, li vrazza e lu cori... Ti pistu la facci, li vrazza e lu cori... Ti pistu la facci, li vrazza e lu cori...

Nina/Pidda

San Giuseppe Iato

San Giovanni La Punta

San Giovanni Rotondo

San Giovanni Galerno

Sant'Agata li Battiati

San Nicola L'Arena

San Nicola Tonnara

Santa Maria la Scala

Santa Maria La Stella

Sant'Alfio

Pidda/Nina Tu l'attacchi e iu la sciogghiu! Tu l'attacchi e iu la sciogghiu! Tu l'attacchi e iu la sciogghiu!

Cola (*felicemente*) Vi la fici... Vi la fici... Li mutanni erunu di Maraaaa!!!

Nina (*precipitandosi su Cola*) Disgraziatu!!! Disgraziatu!!! A fattura a ddà povita Mara!!!

Scena dodicesima **Gaetano e detti**

Gaetano (*accigliato entra e vede*) Chi fu?... chi fu? Chi è c'aviti??? Si puo sapiri chi succeri cà nintra?

Cola (*raggiunge il fratello, non curandosi del silenzio delle due donne*) Ti vulevunu fari a fattura!

Gaetano Picchi vinistuvu nta me casa? Mara unne?

Nina E unni la vosi la so disgrazia quannu si pigghiò a tia!

Gaetano U vuliti un cunsigghiu? Vi nata a ghiri belli e lesti nta me casa cà è megghiu! E nun viniti cchiu a fai i majarii ccà nintra! E soprattutto nun vi ntrumittitti ni l'affari mei!

Nina Affari To?... Affari di me niputi... affari di da povira criatura ccò chianci lacrimi di sangu.

Pidda (*tirandosela*) iemuninni zzà Nina.

Nina Noooo! Chiddu ccà iaia diri lu vogghiu diri... masinnòl scattiu! Ahhhh!! Si fussi viva da santa donna di tò matri, chidda si cà era fimmina cà vilanza nto cori. Ma si è veru cà si vivi nti l'autru munnu... si sta marturianu l'anima, comu la marturiasti tu di viva!!! Talè Gaetanu... pei latri, pi l'assassini e macari pè briganti, ci po' essiri u paradiso... ma pi li figghi tinti noooo!!! No!!! (*guardando in cielo, si inginocchia, poi urlando forte*) Zà Gati... zà Gati!.. Vui

cà siti nto lu pararisu... sintiti li me paroli... Giustizia... giustizia...
GIUSTIZIA!!! (esce trascinando Pidda).

Cola, Gaetano e poi Mara

- Gaetano La me casa addivintau na chiazza!!! Trasunu nesciunu! Pigghianu robbi, fanu fatturii... nun vogghiu viriri cchiù a nuddu... fora.. tutti fora... (a Cola) Unne Mara?
- Cola (*impaurito tace*)
- Gaetano Ohuuu staiu parrannu ccù tia! Unnè Mara!
- Cola (*piangendo*) Trasiti, nisciti... e poi tutti sa pigghiunu ccù mia! (*si scanza temendo la reazione del fratello*)
- Gaetano (*impietoso*) Veni ccà... chi fai ti scanti di to fratuzzu? U sai ca iu ti vogghiu beni... Parra o frati... unnè Mara? Nisciù? Unni iu?
- Cola (*tremante*) A casuzza sdirrubbata...
- Gaetano E ccù cilu dissì!
- Cola (*seppur tremante confessa*) Iu!
- Gaetano (*fruente cerca di afferrare il fratello*) Tu!!! E picchi? Ppi farimi aviri na mala jurnata? Picchi parrasti?
- Cola Picchi Cola dici sempri a virità
- Gaetano A virità e chidda can un si dici mai!
- Mara (*entra violenta*) E già!!! Lu tortu e sempri di cu parra. Tu poi fari tuttu chiddu cà voi e l'autri nun ponnu aviri ne aricchi né ucca.
- Gaetano Mara abbada a comu parri!
- Mara Chi ci isti a fara a casuzza?
- Gaetano Chisti su affari cà nun ti riguardano... nun t'hai a dari tuttu stu cuntu a tia!
- Mara Mi maritasti... m'apparteni!
- Gaetano Sagghiu facisti!
- Mara Gaetano... sta cosa a finiri... o idda o iu!!!
- Gaetano Vai curri... spiii... addumanni... m'assicuto, comu un cani senza patruni! C'à vistu? Si po' sapiri chi viristi? Nenti!!!
- Mara Nenti!!! E s'avissi vistu qualchi cosa?
- Gaetano C'avissutu fattu sintemu?

Mara Ppi quantu è veru Diu v'affucava!!!

Gaetano Senti bedda!!! E megghiu cà ti stai nintra a fari a brava fimminedda di casa...
o pinsamu ppi lu rimediu. (*prende un coltello e comincia a sbucciare un'arancia*)

Mara Sai chi fazzu... Gaetano mi ni vaiu!!!

Gaetano Ti ni vai? Prestu e lesta... vatinni

Mara Mi fazzu la truscia

Gaetano Tempu cià pessu!

Mara Nun ci ni perdu cchiui... (va di la e prende la robba che poi tira a Gaetano)
Chista è roba to! Stu fazzulettu mi lu rialasti tu... Tè!!! Daccillu a da cosa tinta
(*lo lancia, poi và verso la sedia, prende lo scialle della Za Gati e lo indossa*)
Mi ni vaiu... ti lassu, mi ni vai nun sulu da sta casa, ma macari di stu paisi,
basta cà nun ti viru cchiui!!!

Cola Nooo!!! U scialli di me matruzza no!!! Nun ti lu purtar!
(osserva la scena continuando a sbucciare il frutto)

Mara (*Toglie lo scialle... lo guarda con tenerezza... volge lo sguardo al cielo come ricordando la Za Gati...*) Malidittu tu e u iornu cà ti canuscii!
Maliditta iu e u iornu cà misi i peri nintra sta casa!
MALIDITTU TU E TO MATRI CA' TI FICI (*butta lo scialle per terra*)

Cola (è al centro della discussione si abbassa per raccogliere lo scialle)

Gaetano Ahhh!!! Sirpazza vilinusa!!! (*si scaglia contro Mara e accidentalmente colpisce con il coltello in pieno Cola*).
Gaetano Cola!!! Cola !!!
Mara Cola !!! Cola!!!
Gaetano A me fratuzzu ammazzaiiii!!! U vogghiu cchiu beni di la me stissa vita... Cola!
Cola!!! Arrispunni Cola!!! Nun mi lassari fratuzzu miuuuu!!!
Cola (alzando gli occhi) A mamma viru!...
Gaetano Nun mi lassari Colaaaa!!!
Cola E vui u lassati a Cola?
Gaetano No! No!
Cola A lassi tu a Mara?
Gaetano (piangendo) No!
Cola U lassi a Gaetanu?
Mara No cola... no!!!

Cola A Cola u lassati?

Gaetano/ Mara No!

Cola Vasativi allura... (li gurda baciare e voltando lo sguardo al cielo) Mamma...
 tutti e tri anzemula semu!...

Mara (Grida) Colaaaaaaa!!!!

Parte la canzone a cappella NUN LU SAPITI - SEGUE MARCIA FUNEBRE

Fine